

應准其照議開辦並飭沿海關道督飭地方文武認真保護向來衙門陋規相沿成習應一律嚴行革除仍飭俟訂立詳細辦法具詳到日再行咨請商部核示該修撰又議建水產商船學校各項事宜已飭會同上海道妥議章程繪圖詳報再行核定飭遵臣維振興魚業本以保全海權爲要議然查西國海權以潮退三海里爲限英法等國海峽甚狹海濱小島亦多近岸中國沿海海島嶼星羅棋布甚有相隔百餘海里者島無大小遠近皆漁人託業之區趁潮往來不分界限若僅以潮退三海里爲限則名爲保護反蹙海疆不如仍行我向來領海之權較爲上策此不能不揆時度勢深思遠慮預爲聲明者也此節應如何取益防損之處自當與該修撰審慎籌議以維大局謹 奏

雲貴總督丁奏滇省創辦罪犯習藝所情形摺

竊查前准部咨議覆護山西撫臣趙爾巽奏各省通設罪犯習藝所軍流徒犯卽在犯事地方收所習藝一摺奉 旨依議欽此等因咨行到滇當經轉行遵辦惟滇省地處邊瘠庫藏空需此項罪犯習藝所若照部章於省城及各巡道駐紮處所一律舉辦經費浩繁力有不便雖新章議以贖銀撥所充用作正開銷無如滇民貧苦歷來贖罪無人萬難恃作的款因查本省定案照章得免發配各遣軍流徒及外省咨解來滇應行收所習藝人犯爲數無多

擬先於省城創建一所凡通省軍流徒犯暫令收所習藝俟辦有成效再行逐漸擴充當經籌款度地委員修建應設犯室工廠養病房以及收儲貨料委員辦公教習人役住宿之所約可容止二百人一切事務即歸臬司督辦另委提調收支文案監督等各員教習及各色雜役則視罪犯之多寡隨時酌定應需經費暫由善後局提撥如有贖罪銀兩仍照章撥所應用所習之藝專取粗淺如織布彈花等類俾易習成或應罰作苦工均查照部章辦理仍撥駐營勇一哨藉資彈壓並酌定章程總綱四條以便遵守謹 奏奉 硃批刑部知道欽此

出使俄國大臣胡致商部籌議織獸毛製樹膠咨呈

竊照整頓商務一面宜推廣土貨出口曾於光緒三十年九月條舉易辦者兩端咨商貴部考核在案一面尤宜減少洋貨進口以杜漏卮減少之法禁遏固萬不可重稅又未易辦到則惟有竭力仿造以求合本國之用願仿造洋貨極非易事徒震於有利可獲而不先研究製造之理製造之術與製造之地驟然建廠屋購機械聘用西洋人爲技師委不學者爲總辦擲金數十萬縣時二三年迄未見有一物之成出廠入肆卒之或虧或輟貽人口實比比皆是有鑒於此者又或懲羹吹齏視製造之學過於高深不敢著手又未免圖易於難二者